

REGLUGERÐ

um búfjárrækt.

1. gr.

Gildissvið.

Reglugerð þessi tekur til eftirtalinna búfjártegunda: Alifiska, alifugla, hrossa, kanína, loðdýra, nautgripa, sauðfjár og svína.

2. gr.

Búfjárræktarsamþykktir.

Búnaðarsambönd skulu setja sér búfjárræktarsamþykktir um tilhögun ræktunarstarfs í hverri búgrein á sambandssvæðinu. Búfjárræktarsamþykktir skulu gerðar að fyrirmyndum frá Búnaðarfélagi Íslands samkvæmt tillögum frá búfjárræktarnefndum. Þar skal kveðið á um framkvæmd einstakra þátta ræktunarstarfsins sem lög um búfjárrækt mæla fyrir um og skiptingu framlags úr ríkissjóði milli búnaðarsambands og starfandi búfjárræktarfélaga í hverri búgrein.

Búnaðarsambönd geta falið einstökum búfjárræktarfélögum framkvæmd þessa verkefnis enda fullnægi þau skilyrðum viðkomandi búfjárræktarsamþykktar. Lög viðkomandi búfjárræktarfélags skulu kveða á um starfssvæði þess, sem getur náð yfir fleiri en eitt búnaðarsambandssvæði, enda komi til samþykki viðkomandi búnaðarsambanda. Búnaðarsambönd geta einnig falið búgreinafélögum eða búgreinasamtökum framkvæmd ræktunarstarfsins, enda hafi þau ræktun búfjár á stefnuskrá sinni og fullnægi skilyrðum viðkomandi búfjárræktarsamþykktar.

3. gr.

Búfjárræktarnefndir.

Í hverri búgrein skal starfa búfjárræktarnefnd. Í hverri nefnd sitja fimm menn og jafnmargir til vara. Stjórn Búnaðarfélags Íslands skipar formann, sem skal vera landsráðunautur í viðkomandi búgrein (héraðsráðunautur ef landsráðunautur er ekki starfandi). Búnaðarþing kýs tvo nefndarmenn úr hópi héraðsráðunauta sem starfa við viðkomandi grein og aðra tvo úr hópi starfandi bænda í greininni. Séu starfandi búgreinafélög, sem sett hafa sér búfjárræktarsamþykkt og uppfylla að öðru leyti skilyrði laganna kjósa þau fulltrúa úr hópi bænda í stað Búnaðarþings. Varamenn skulu kosnir eða skipaðir á sama hátt. Kjörtími hverrar nefndar er tvö ár.

Heimilt er að ákveða að í búfjárræktarnefnd sé tveimur fulltrúum færri eða fleira en áskilið er í 1. mgr. ef sérstakar ástæður þykja til, en hlutföll héraðsráðunauta og bænda séu þó jöfn.

Verkefni búfjárræktarnefndar er eftirfarandi:

- a) að móta ræktunarstefnu í viðkomandi grein og hafa eftirlit með framkvæmd ræktunarstarfsins á hverjum tíma. Nefndin skal skilgreina ræktunarmarkmið og setja reglur um framkvæmd meginþátta ræktunarstarfsins, þ.m.t. reglur um skýrsluhald, reglur um búfjár- og afurðadóma og reglur um val gripa til notkunar á ræktunarstöðvum, sem framlags njóta skv. búfjárræktarlögum.
- b) að gefa landbúnaðarráðherra umsögn um og gera tillögur um innflutning erlendra búfjárkynja í samræmi við lög um innflutning dýra nr. 54/1990.
- c) að vera til ráðuneytis um málefni greinarinnar þeim aðilum sem annast rannsóknir, leiðbeiningar og kennslu í henni.
- d) að vera til ráðuneytis við gerð verk- og kostnaðaráætlunar um búfjárræktarstarfið í greininni.

4. gr.

Starfssvið og menntun ráðunauta.

Landsráðunautar Búnaðarfélags Íslands skulu veita forystu leiðbeiningaþjónustu, hver í sinni grein og fylgjast með að ákvæðum laga um búfjárrækt sé fullnægt. Landsráðunautar skulu hafa lokið kandídatssprófi í búvísindum og sérnámi á starfssviði sínu eða hafa starfsreynslu, sem stjórn Búnaðarfélags Íslands metur jafngilda.

Héraðsráðunautar skulu vinna að og hafa eftirlit með framkvæmd búfjárræktarlaga, hver á sínu starfssvæði, í samráði við landsráðunauta. Þeir skulu hafa kandídatsspróf í búvísindum eða sambærilega menntun.

Þriggja manna kjaranefnd ákveður við hvaða launaflokk hlutur ríkisins í launum héraðsráðunauta skuli miðast og hvernig meta skuli ferðakostnað héraðsráðunauta til greiðslu. Nefndina skipa fulltrúar frá landbúnaðarráðuneyti, fjarmálaráðuneyti og fulltrúi frá búnaðarsamböndum, kosinn á formannafundi þeirra. Sá hluti launa héraðsráðunauta, sem ríkissjóði ber að greiða, skal miðast við kjarasamning Félags íslenskra náttúrufræðinga og fjarmálaráðherra og skal kjaranefndin byggja ákvarðanir sínar á honum hverju sinni.

5. gr.

Ræktunarstöðvar.

Ræktunarstöðvar fyrir búfé, sem nú starfa skv. lögum um búfjárrækt eru eftirtaldar:

Í nautgriparækt:

Nautastöð Búnaðarfélags Íslands á Hvanneyri.

Nautauppaldisstöð Búnaðarfélags Íslands í Þorleifskoti.

Í sauðfjárrækt:

Sauðfjársæðingarstöð Búnaðarsambands Suðurlands í Þorleifskoti.

Sauðfjársæðingarstöð Vesturlands í Borgarnesi.

Sauðfjársæðingarstöðin á Möðruvöllum.

Í hrossarækt:

Stóðhestastöð ríkisins í Gunnarsholti.

Hrossaræktarbúið á Hólum í Hjaltadal.

Nýjar stöðvar í þessum eða öðrum búfjárgreinum verða aðeins stofnaðar með samþykki landbúnaðarráðherra að fengnum meðmælum viðkomandi búfjárræktarnefndar.

Kjaranefnd samkvæmt 4. gr. þessarar reglugerðar, ákveður við hvaða launaflokk hlutur ríkisins í launum starfsfólks á ræktunarstöðvum og frjótækna skuli miðast.

6. gr.

Nautgripasæðingar.

Búnaðarsamböndum er heimilt að innheimta gjald af allri innveginni mjólk í mjólkurbú vegna kostnaðar við sæðingar mjólkurkúa á búnaðarsambandssvæðinu. Gjald þetta getur að hámarki verið 1% af grundvallarverði mjólkur á hverjum tíma. Búnaðarsambönd skulu tilkynna mjólkurbúum fyrir 1. desember ár hvert á hvern hátt þessi heimild skuli nýtt á komandi ári. Mjólkurbú standi skil á gjaldinu til búnaðarsambands mánaðarlega.

Ríkissjóður greiðir árlega styrk til jöfnunar á flutningskostnaði sæðis og ferðakostnaði frjótækna hjá búnaðarsamböndunum sem nemur 95,00 kr. á sædda kú á verðlagi ársins 1988. Verðlagsuppbót á styrk til sæðinga mjólkurkúa skal reikna samkvæmt vísitölu kostnaðar sem Hagstofa Íslands ákveður með hliðsjón af breytingum á aksturtöxtum hjá ferðakostnaðarnefnd ríkisins.

Skipting styrksins á milli búnaðarsambands skal hverju sinni ráðast af fjölda sæddra kúa á hverju svæði og meðalakstursvegalengd vegna hverrar sæðingar samkvæmt reglum frá Búnaðarfélagi Íslands sem landbúnaðarráðherra staðfestir.

7. gr.

Framlög til skýrsluhalds.

Skipting framlags, sem ríkissjóður greiðir til búfjárræktarstarfsemi á milli búgreina, skal staðfest af landbúnaðarráðuneyti að fengnum tillögum frá Búnaðarfélagi Íslands. Sú skipting skal einkum taka mið af þeirri starfsemi sem fram fer skv. ákvæðum 7. gr. laga nr. 84/1989, en með hliðsjón af framleiðsluverðmætum hverrar búgreinar að því marki sem þau eru sambærileg. Heimilt er að verja allt að 10% framlagsins til sérstakra átaksverkefna í einni eða fleiri búgreinum, ef sérstök ástæða þykir til.

Búnaðarfélag Íslands, eða þeim aðila öðrum sem annast uppgjör á afurðaskýrslum, er heimilt að innheimta útlagðan kostnað vegna eyðublaða og útsendingar gagna. Viðkomandi búfjárræktarnefnd skal setja reglur um skiptingu framlags til einstakra verkefna í búgreininni. Búfjárræktarfélag sem styrks njóta skulu hafa skilað skýrslum sem fullnægja þeim skilyrðum er búfjárræktarnefnd í viðkomandi grein hefur sett.

8. gr.

Búfjársýningar.

Búnaðarfélagi Íslands er skylt að gefa búfjáreigendum reglulega kost á dómum á kynbótagripum og eigi sjaldnar en fjórða hvert ár, samkvæmt reglum sem viðkomandi búfjárræktarnefnd setur og stjórn Búnaðarfélags Íslands staðfestir. Reglur þessar skulu kveða skýrt á um hvaða sýningar er skylt að halda skv. lögum um búfjárrækt. Þar skal einnig tilgreina reglur um framkvæmd sýninga. Búnaðarfélag Íslands skal annast að ráðunautar gegni dóms- og matsstörfum vegna slíkra verkefna. Dómsstörf annast landsráðunautur(ar) Búnaðarfélags Íslands eða aðrir þeir sem stjórnin ræður til slíkra starfa og uppfylla þær starfskröfur sem gerðar eru til ráðunauta. Launa- og ferðakostnað ráðunauta greiðir Búnaðarfélag Íslands, en annan kostnað þeir aðilar sem að sýningum standa.

Sýningaraðilum er heimilt að innheimta gjald af sýndum gripum til að mæta kostnaði við framkvæmd sýninga. Gjaldskrá vegna búfjársýninga skal staðfest af landbúnaðarráðherra að fengnum tillögum viðkomandi búfjárræktarnefndar.

Sláturleyfishafar skulu láta í té aðstöðu til nauðsynlegra athugana á föllum sláturgripa. Þeim sem slíkar athuganir gera ber skylda til að gera viðkomandi sláturleyfishöfum viðvart með góðum fyrirvara vegna áætlunar um slátrun gripa í viðkomandi sláturhúsi.

9. gr.

Brot á ákvæðum reglugerðar þessarar varða viðurlögum samkvæmt 18. gr. laga nr. 84 30. maí 1989. Með mál út af brotum skal farið að hætti opinberra mála.

10. gr.

Reglugerð þessi er sett samkvæmt heimild í lögum um búfjárrækt nr. 84 30. maí 1989 og öðlast þegar gildi. Jafnframt er úr gildi felld reglugerð um búfjárrækt nr. 139 31. ágúst 1967.

Landbúnaðarráðuneytið, 26. ágúst 1991.

Halldór Blöndal.

Jón Höskuldsson.